

## REGIONAL NEWS

HEADLINES:-

1. Governor Hari Babu Kambhampati an naktuka Lok Sabha member inthlan vote thlak turah vote nei zawng zawng te vote thlak theuh turin a sawm.
2. Naktuk-a Lok Sabha member thlanna vote thlak huna duty tur te chuan an duty na tur hmun te thleng felin, inbuatsaihna pawh peihfel a ni.
3. Chief Election Commissioner Rajiv Kumar chuan mipuite chu mipui rorelna democracy-a an mawhphurhna hria a vote thlak ngai pawimawh turin a sawm..
4. Election Commission chuan vawiin khan Lok sabha inthlan thawh lina atana hriattirna a ti chhuak.

&lt;&gt;&lt;&gt;&lt;&gt;

GOVERNOR

Governor Hari Babu Kambhampati an naktuka Lok Sabha member inthlan vote thlak turah vote nei zawng zawng te vote thlak theuh turin a sawm a, democracy kutpui hlu takah hian mitinin an chanvo vote an thlak ngei a duhsak tih a sawi a ni.

Governor chuan thalaite a bikin vote nei thar, an vote thlak vawi khatna tur te chuan kim taka thawkchhuak turin a sawm a, vote a tlak that ngei a beisei a ti. Mizoram chu state dang te nen tehkhinin lekhathiam tamna state ani a, a chhunga cheng mipuite pawhin an dikna leh chanvo an hria a, an mawhphurhna pawh an hria a, hei vang hian vote thlak tura chhuak pawh an thehnm hle turah a ngai tih a sawi a ni.

Mizoram ah hian a pumpuiah voter nuai 8 sing 6 & 1,277 an awm a, Service voter 4,980 an awm a ni.

Mipa vote nei mi Nuai 4,14,777 an awm a, hmeichhe vote nei mi Nuai 4,41,520 an awm bawk a. Kum 85 chunglam voters awmin PwD voters 3397 an awm a, young voters kum 18-19 mi 36,370 an awm bawk a ni.

Mizoram Chief Electoral Officer tarlan danin Aizawl district-ah voter mi 2,88,268 an awm a, hei hi a district ang a chhut a voter tamna ber a ni a. Hnahthial district-ah voter 16,257 awmin a district ang a voter tlemna ber a ni. Mipui tam zawng chhuta voter tamna ber bial chu Tuichawng Bial niin voter 36,493 an awm a, Mipui tam zawng chhuta voter tlemna ber bial chu Thorang Bial niin voter 15,152 an awm a ni. Polling station voter nei tamna ber chu Zemabawk VIII niin hetah hian Voter 1483 an awm a Polling station voter nei tlemna ber chu Thehlep polling station niin voter 25 an awm a ni.

&lt;&gt;&lt;&gt;&lt;&gt;

POLLING PARTIES

Naktuk-a Lok Sabha member thlanna vote thlak huna duty tur te chuan an duty na tur hmun te thleng felin, inbuatsaihna pawh peihfel a ni.

Nimin khan hmun hla zuala duty tur te chuan an dutyna tur hmun an pan a, a tam zawk chu vawiin khan an duty na tur hmun an thleng thung ang.

Sorkar thuchhuahin a tarlan danin polling station 1276 zinga 168 chu P-2 polling station, polling station hla leh kilkhawr bik a ni a. Heng hmuna duty tur polling party te chuan nimin khan an duty na hmun tur an pan a. A bak zawng P-1, polling station 1108-a duty tur polling party te chu vawiin khan an chhuak veleh

bawk a ni. Kumin Lok Sabha inthlanpuiah hian polling official mi 5,071 an duty dawn a ni.

><><>

### SPL BULLETIN

Akashvani Regional News Unit chuan naktuk hian Lok Sabha inthlanna pualin special bulletin a tichhuak dawn a,

Chanchintha puan hun pangai zing dar 7.30 leh Headlines News puan thin bakah chawhma dar 10, dar 12, dar 2.30 leh tlai dar 4 ah te chanchintha, vote tlak dan thar ber te minute 5 chung puan thin a ni dawn a ni.

Hei bakah hian zan dar 8 leh min 2 ah inthlan vote thlak chungchang sawihona, Discussion by Panel of Experts chu tihchhuah a ni ang.

<><><>

### MURDER

Vawiin chawhnu dar 2 vel khan Buhchangphai Gosen Veng a cheng Pu Lalthansanga kum 45 chu a thianpa Pu Lalngaihawma kum 52 miin a nghawng ah chempui in a zai a, Kolasib Hospital panpui anih laiin Lalthansanga hi a hliam tuar lovin boral.

Kan corr thudawn danin, Lalthansanga leh tualthattu a puh Lalngaihawma te hi Bru hnam ve ve niin, tukin atang khan an inkawm a, Zu an in dun ni a hriat ani. Vawiin chawhnu thleng khan inkawm in, Lalngaihawma In ah an inkawm lai hian an inhnial a, In neitu Lalngaihawma hian a thianpa hi chempui in a hmlam nghawngah a zai ta mai ni a thudawn ani.

Lalthansanga ruang hi Kolasib District Hospital-a ruang dahna ah dah in, naktuk chawhma lamah post mortem ani ang. Lalthansanga hian nupui neiin, fa 5 a nei a, a nupui leh a fate hi Tripura ah an khawsak lai ani.

Bilkhawthlir Police te chuan tualthattu a puh Lalngaihawma hi vawiin tlai khan man in, thubuai an siam sak a, naktukah Kolasib District Court ah hruai ani ang.

<><><>

### BRIDGE COLLAPSE

Bairabi khaw luh dawna Kawnpui lui Lei chhuat phah (deck) chu nizan dar 10:30 vel khan phai lam atanga lo chho lirthei (Truck lian) cement phur in a rap chhe leh a, Lei chhe lai hi vawiin nileng khan siam ani.

Lei chhuat rap chhetu Truck ke hi Lei kalkhang (transom) kar ah a tang a, hei vang hian vawiin nileng khan Lei ah hian lirthei eng chi mah a kal tlang thei lo a, zanin thim hlim dar 6:15 vel khan lirthei te (light vehicle) chin hnuai lam te chu a kal tlang leh thei chauh ani.

He Lei hi tunkar thawhlehi zing dar 4 vel khan Tiau lung phur Hyva Tripper in a rah chhiat avangin nizan dar 10 vel khan siam that ani chauh a, siam that atanga darkar chanve hnuah Cement phur Truck hian a rap chhe ve leh ani.

><><>

### CEC

Chief Election Commissioner Rajiv Kumar chuan mipuite chu mipui rorelna democracy-a an mawhphurhna hria a vote thlak ngai pawimawh turin a sawm. Pu Kumara chuan naktuk maiah Lok Sabha inthlan vote thlak tan anih tawh dawn avangin inthlanna chu mipuite kuta awm a ni a, an duhthlanna pawh an kuta awm a ni a ti a. Anmahni tan mai bakah an chungkua, an fate, an khua leh ram tana vote thlak tur an ni a ti a. Akashvani-in a kawmnaah CEC chuan vote khat lek pawimawhna hi hlamchhiah chi a ni lo tih sawiin hmun tam takah vote khat pawimawhzia hi a lo lang fo a ti bawk.

Election Commission inbuatsaihna sawilangin voter te mamawh lo chhawp turin theihtawp an chhuah a ti a, polling station tin chu inchhawngah pawh a hnuai ber zelah siam a ni a, tuisik in turte, kutsilfaina pindante, thut hahchawlhna, ramp, wheelchair leh tanpui ngaite lo puitu tur dawhkante siam a ni a ti a. Kum 85 chunglam leh rualbanlote tan mahni in atanga vote thlak phal a ni a ti bawk. Pu Kumar-a chuan khua a lum dawn avangin mipuite fimkhur turin a chah a, India mi te phurna hian khawlum hi a hneh ngei a beisei thu a sawi a ni.

<><><>

#### 4<sup>TH</sup> PHASE OF LS

Election Commission chuan vawiin khan Lok Sabha inthlan thawh lina atana hriattirna a ti chhuak.. Inthlan thawhli naah hian state pakua leh Union Territory pakhata Lok Sabha seat 96 ah inthlan a ni dawn a.

Andhra Pradesh ah seat 25, Telangana ah 17, Uttar Pradesh ah 13, Maharashtra ah 11, Madhya Pradesh leh West Bengalah 8 ve ve, Bihar ah panga, Jharkhand leh Odisha ah pali leh Jammu and Kashmir ah 1 ah te inthlan buatsaih a ni ang.

Tun thla ni 25 thleng inthlan chuh turte tan hming thehluh theih a ni a. May ni13 ah vote thlak a ni anG.

Lok Sabha inthlan thawhLina rual hian Andhra Pradesh Assembly inthlan leh Odisha Assembly inthlan thawh khatna neihna tura hriattirna tihchhuah ve nghal a ni.

<><><>

#### MSC ARIES

Tunhnaia Iran-a bungraw phur hren tawh MSC Aries-a thawk ve Indian hmeichhe deck cadet Ann Tessa Joseph chu vawiin khan Kerala-ah hruai haw a ni. Thlawhna hmangin Cochin International Airport ah phurh haw a ni a. External Affairs Ministry thuchhuah danin Tehran-a Indian Mission leh Iran sawrkar theihtawp chhuah avanga phurh haw an ni a. He lawnga chuang ve dang India mi 16 te pawh an hriselna a tha a, an chhungte nen pawh an inbepawp thei niin sawrkar thuchhuah chuan a tarlang a ni.

<><><>